



ATASSUT
Postboks 399
3900 Nuuk
Tlf: +299 32 33 66
+299 34 50 00
+299 34 62 53
Fax: +299 32 58 40
atassut@greenet.gl
www.atassut.gl

08. marts 2006

Inatsisartut suleriaasianni § 36, imm. 1-iat malillugu Naalakkersuisunut imaattumik apeqquteqassaagut; Great Greenland A/S-mi pisortaq pillugu ammasunik Jakob Abelsen-mit Naalakkersuisut siulittaasuata allagarsinerata kingorna Naalakkersuisut qanoq iliuuseqarniarpat?

Naalakkersuisut siulittaasuannut allakkat ammasut Inatsisartunut ilaasortanut ilanngullugit agguaaneqartut tunngavigalugit matumuuna siuliani apeqqtigisagut nangillugit allakkat ammasut imarisai pillugit Naalakkersuisunut ima apeqquteqassaagut:

Great Greenland A/S-mi piffissami august 2002-miit april 2005-ip tungaanut aningaasaqarnermut pisortaasimasoq Naalakkersuisut siulittaasuannut ammasunik allagaqarnermigut ilaatigut ima allappoq:

- Ilisimavara Canadamiut amiutaat 2003-mi aamma 2004-mi, Great Greenland A/S-imut toqqaannartumik annertuumillu matussuserneqartariaqartunik amigartoorutaasut (2004-mi igitsisariaqarnerit kingunerisaanik). Tassa imaappoq ingerlatseqatigiiffiup sinneranut naammassisaqarfiusumik suminermilluunniit piffissami tassani tapertaas**imanngillat**. Illuatungaani amigartoorutaapput, naggataatigut piniartunit imaluunniit Nunatta Karsianit matussusertinneqartariaqarsimasunik.
- Ulloq 9. marts 2005 (atorfinit tunuarnissara sioqqullugu) siulersuisut siulittaasuannut qarasaasiakkut allagaqarpunga, allakkamilu tassani erseqqissakkama ilagaat, Canadamiut amiutaat pillugit kisitsisit eqqortut, pisortap piaaraluni siulersuisunut apuunnaveersaarinninnera arlaannaatigulluunniit isiginnittuuffigiinnarusunnikkiga.
- Tamannami sioqqullugu tunisinermi naatsorsueqqissaarnernik siulersuisuni ilaasortanut tamanut nassitsiumanikuugaluarpunga. Tamannali pisortap itigartitsissutigaa.

- Tunisinermi naatsorsuutit takutittussaagaluarpaat, ingerlatseqatigiiffik tunisassiornerni ataasiakkaani sutigut iluanaaruteqavinnersoq (aammalu ajunaaruteqarnersoq). Uanga isinni paasissutissat taakku atuassallugit pisariaqarluinnarpoq, tassami siulersuisut soqutigisarilluinnartariaqarmassuk (akisussaaffigalugulu) ilisimassallugu ingerlatseqatigiiffik sutigut ingerlatseqatigiiffik aningaasarsiornikkut iluanaaruteqartarnersoq (annaasaqarnerlorlu).”

Allakkat imarisaat ungasinngitsukkut Great Greenland A/S-ip Inatsisartunut Naalakkersuisunullu paasititsissutaasumik Hotel Hans Egede-mi ataatsimeeqatigiinermi, Great Greenland A/S-ip tungaaninngaaniit saqqummiunneqartunut naapertuutinngillat.

Tassami ataatsimeeqatigiinermi ilisimatinneqarpugut Great Greenland A/S Canada-miit amminik pisisaasappat tamanna Great Greenland A/S-mut aningaasaqarnikkut nappanneqarsinnaangitsumik kinguneqassasoq.

Massakkullu allakkat ammasut aqutigalugit paasitinneqarpugut ammit Canadameersut amigartoorutaasartut taamaatumillu nunatsinni puisit amiinik pisiortornermut tapiisutaasunit amigartoorutaasut matussuserneqartarsimasut.

Allakkat ilumoorsimappata taava Great Greenland A/S-miit qinikkat eqqunngilluinnartunik passissutissanik tuniorarneqarsimapput.

Naalakkersuisut apererusupparput allakkat tunngavigalugit misissortariaqartutut tikkuarneqartut, sukumiisumik misissorneqarnissaat qulakkeerniarlugu iliuuseqarniarnersut, ilanngullugu apeqqutigerusupparput suliap oqimaasusaa aallaavigalugu misissuinerup nalaani pisortap suliunnaarsikkallarneqarnissaa siunertaralugu Great Greenland A/S piaarnerpaamik immikkut ittumik ataatsimeersuartinneqarnissaa isumaginiarneqarnersoq.

Aamma paaserusupparput misissuinerup naammassinissaata tungaanut paasissutissanik pingaarutilinnik piioneerutitsisoqannginnissaa qulakkeerniarlugu Naalakkersuisut qanoq iliuuseqarsimanersut imaluunniit iliuuseqalersaarnersut.

ATASSUT-miit apeqqutigut piaartumik akineqassasut kissaatigaarput, tassami suliaq pinartutut isigisariaqarmat, kinguarsarnertaqanngitsumillu iliuuseqarfigineqartariaqarmat.

Inussuarnersumik inuulluaqqusillunga

ATASSUT-ip Inatsisartuni ilaasortaaitai sinnerlugit:

Augusta Salling

Gruppemi siulittaasoq